

Si₂ carta a₂ca₂jmo₃ San Pablo ne₄

TITO

Jmo₅ Pa₄ si₂ a₂chein₃ ne₄ Tito

1 ¹ Jniá₂ Pa₄, líng₅ dsa₂ i₂jme₂ti₃ ta₁ ne₄ Diú₄, líng₅ jan₂ dsa₂ i₂chen₄ quián₅ Jesucristo ia₁jaun₂ le₃'én₂ ca₂le₃jín₃ i₂ma₂quión'₂ Diú₄, ia₁jaun₂ le₃cuí'₅ jág₁ tí₅ a₂jiog₅ jui₅ dse₃, ² ia₁jaun₂ jmo₃ 'ín₂ dsí₅ ja₁le₃chain₂ co₂tan₅₄. Diú₄, i₂tsá₃ lé₂ le₃chain₂ tē₂jín₁, ca₂cuë₃ jág₁ quió'₅, a₂ca₂i₃jiog₅ dsí₅ lia'₂ con'₂ né'₃ gué₄ a₂nio₃ mí₂güíg₃, a₂le₃chong₂ jniog₄ co₂tan₅₄. ³ Né₃ gué₄ né₃, ca₂té₂ jmig₄ a₂le₃ne₄ jniog₄ jág₁ dse₃ tē₂le₃ quian'₅₄ jág₁ a₂'é₄ jniá₂ a₂ma₂dsia₃ Diú₄ quián₂ i₂lió₂ o₄gu₃, lia'₂ con'₂ lé₅ 'éi'₃ quió'₅. ⁴ Jmo₅ jniá₂ si₂ la₂ dsiang'₅₄ ne'₅₄ 'ne₂ Tito i₂líng'₅ co₂'nió'₄ jan₂ jón₃ quiáng₃ tē₃dsón'₂, ia₁ 'éin₂ jniog₄ le₃o₃. Jui₁jme₂gu'₅₄ Diú₄ 'ne₂, jui₁'ei₅ tei₄ 'au'₂, jmo₅ Diú₄ Jmei₂ jniog₄, jmo₅ Te₁gui'₅₄ Jesucristo i₂ma₂ca₂lió₂ jniog₄ né₃.

Ta₁ quió'₅ Tito a₂jmo₃ 'uë₃ Creta

⁵ Ca₂dsián₃ jniá₂ 'ne₂ 'uë₃ Creta ia₁jaun₂ jme₁rë'₂ 'ne₂ a₂'nió'₅ lé₂ gué₄ dse₃, a₂dsiáng'₄ dsa₂ can'₅₄^a i₂nio₃ ne₄ jmo₃ 'í₁ le₂caun₂ le₂caun₂ guá'₅ lia'₂ con'₂ lé₅ jág₁ a₂ma₂juá'₃ jniá₂, ⁶ jui₁lia'₂ i₂chan₂ i₂tsá₃ cha₂ jua'₅₄ lé₂ le₃bóg'₂ dsa₂ dso₄, i₂'njo₅ jan₂ bá₄ dsa₂ mí₂, i₂'njo₅ chi'₂ quián₅ i₂'én₂, i₂tsá₃ 'e₂ qui₂rë'₂'ní₄ jua'₅₄ a₂lë₁qui₂i₂nioi₅₄, jua'₅₄ nau₂ 'nei₂ né₃. ⁷ Dsa₂ i₂niog₅ gu₂ guá'₅, ^b ca₂tíin₂ njí₃ le₃ne₄ Diú₄ tsá₃ 'e₂ jág₁ cha₂ jua'₅₄ lé₂ le₃bóg'₂ dsa₂ dso₄, on₃jua'₅₄ i₂tsá₃ jág₁ cán₂, on₃ guë'₂ i₂caun₂ lë₁rë₂'ne₂, on₃ guë'₂ 'nió'₅ lén₂ jan₂ dsa₂ 'en₅, on₃ guë'₂ dsa₂ i₂tíin₂ dsí₅ 'no₅ mí'₅₄, on₃ guë'₂ dsa₂ i₂lë₁'nio₃ lí₂ cu₄ quió'₅ dsa₂ né₃. ⁸ Të₂le₃ 'nió'₅ qui₂guein₃ dsa₂ i₂dsi₁lén₂ quió'₅. 'Nió'₅ léin₂ jan₂ dsa₂ i₂të₅ dsí₅ jmá'₃ a₂dse₃, li'₅₄ quió'₅, i₂quian₅ caun₂ jui₅ rë₂, i₂jñiό₅, i₂con₂ dsí₅ né₃. ⁹ 'Nió'₅ léin₂ jan₂ dsa₂ i₂chan'₂ tiá₂ jág₁ tí₅ dsón'₂ lia'₂ con'₂ lé₅ ca₂rë₃tíin₃, ia₁jaun₂ bá₄ lé₂ le₃cué'₃ lián'₂ dsí₅ dsa₂ sián'₂ jmá'₃ lia'₂ con'₂ lé₅ juá'₅ dse₃, lé₂ le₃jme₃'uáin₂ dsí₅ dsa₂ i₂juá'₂ 'lig'₅₄ 'ë₂₃ jág₁ dse₃.

¹⁰ Ia₁ juín₅ bá₄ dsa₂ i₂tsá₃ ne'₅₄, i₂dsia₅ jág₁ a₂tsá₃ ta₁ tí₄, i₂juí₁gan₂ né₃, tē₂le₃ lé₅ gué₄ jë₄ quió'₅ dsa₂ judíos.^c ¹¹ Dsa₂ i₂le₂'éi₂ 'en₄ jne₃ dsa₂ mí₂'o₄, ia₁ ta₁jma₃caun₂ cho'₅₄ dsa₂ dsi₂néi₂ ma₂le₁gáin₃ ma₂le₁'ág₄ caun₂-tíin₃ dsí₅ a₂jme₁ma₂'éin₂, ia₁ i₂'éi₂ i₂nio₄ jme₂tag₂₃ a₂tsá₃ ca₂tíin₂ a₂jnia'₅₄ 'nio₃ lí₂ cu₄ bá₄. ¹² Dsón'₂ bá₄ dsau₅ jui₁lia'₂ ca₂juá'₂ jan₂ dsa₂ go₅₄ guioin₅₄ ma₂líg'₂ jme₁ca₂juá'₂: "Dsa₂ chan₂ Creta 'njo₅ lin₃ tē₂jíin₁, líin₅

^a5 griego: presbúteros.

^b7 griego: epískopos.

^c10 lit. "jë₄ quió'₅ dsa₂ i₂rë₂uing₄ lo₄."

juí₁lia'₂ lín₅ já'₂ tsau₂ dsí₅, juín₅, jléin₂ né₃."¹³ Jaun₂ tí₅ bá₄ jág₁ ca₂juá'₂ 'éi₂. Jaun₂ lë₃ juá'₅ jniá₂ tě₂jéin₃ 'ne₂ 'ñio₅ lín₃, ia₁jaun₂ náu₃ táng₃ tsán'₂ tiá₂ jág₁ dse₃,¹⁴ ia₁jaun₂ tsá₃ ma₃tón'₂ jui₅ jág₁ a₂lë₁'no'₂ dsa₂ judíos dsí₅ guioin₅₄, on₃ guë'₂ 'nió'₅ tón'₂ jui₅ 'e₂ 'éi'₃ cuë₅ dsa₂ i₂tsá₃ ji'₅₄ jág₁ tí₅.
¹⁵ Tě₂le₃ quió'₅ dsa₂ i₂le₁jé₃ tě₂dsí₅, ca₂le₃jé₃ bá₄ cosa ma₂le₁jé₃. La₁ tě₂le₃ quió'₅ i₂dsí₂jiog₅ 'lig'₅₄ dsí₅, i₂tsá₃ 'én₂ né₃, 'i₁caun₂ tsá₃ 'e₂ le₁jé₃. Ia₁ ma₂le₁'ióg₄ a₂dsí₂jiog₅ dsi₅₄, le₂jiog₅ a₂qui₂dsí₂jni₅ dsí₅ né₃.¹⁶ Juá'₂ bá₄ a₂cuiin₂₃ Diú₄, la₁ tě₂le₃ quian'₅₄ a₂jmo₂₃ guë'₂ né₃, jáng'₅ léi₄ a₂tsá₃ dsau₅. 'Lig'₅₄ lín₃ bá₄ jmo₂₃ ne₄ Diú₄, 'io'₅₄ jág₁ dse₃, 'i₁caun₂ a₂dse₃ tsá₃ ta₁ téin₄ jmo₃.

Jui₁lia'₂ juá'₅ tí₅ dsón'₂

2 ¹ La₁ 'ne₂ né₃, chei'₅₄ dsa₂ lia'₂ con'₂ lé₅ juá'₅ dse₃. ² Jui₁lia'₂ dsa₂ can'₅₄, jui₁jmo₁₂ 'en₅₄ dsí₅, tsá₃ caun₂ lë₁lín₅, jui₁jmo₁₂ li'₅₄ quió'₅, jui₁le₂'éin₂ bá₄ juá'₅ dse₃, jui₁jme₂'nói₃ riin'₅₄, jui₁jmo₁₂ bá₄ juin'₂ dsí₅.
³ Ján₃ guë'₂ le₂jaun₂ tě₂le₃ quió'₅ dsa₂ mí₂ ma₂can'₅₄, jui₁i₂nói₅₄ jnió₅, tsá₃ jui₁'iin₁₂ riin'₅₄ jua'₅₄ a₂lë₁bógl₂ dso₄, on₃ guë'₂ 'nió'₅ jme₂tiin₂₃ dsí₅ 'ín'₂ ti₁jmíg₃, tě₂le₃ ca₂tfin₂ 'ë₃ caun₂ jui₅ dse₃,⁴ ia₁jaun₂ lé₂ le₃jme₃tiin₂₃ jui₁lia'₂ 'io₅₄ chi'₂ 'a₂ lia'₂ jme₃'nói₃ dsi₂i₂gu₂, a₂jme₃'nói₃ chi'₂-guein₂ quiáin₅ né₃,⁵ 'a₂ lia'₂ jmo₃ 'en₅₄ dsí₅, 'a₂ lia'₂ jmo₃ léi₄ a₂ma₂le₁jé₃ tě₂dsí₅, 'a₂ lia'₂ jmo₃ 'í₁ dse₃ dsi₂néi₂ quió'₅, 'a₂ lia'₂ jmo₃ 'ua₁ dsí₅, 'a₂ lia'₂ tóin'₃ 'éi'₃ quió'₅ dsi₂i₂gu₂ né₃, ia₁jaun₂ bá₄ tsá₃ 'ein₂ juá'₂ 'lig'₅₄ 'ë₃ jág₁ quió'₅ Diú₄.

⁶ Ján₃ guë'₂ le₂jaun₂ chei'₅₄ dsa₂ ñe'₂ chi'₂ ca₂tfin₂ jmo₃ 'en₅₄ dsí₅.
⁷ Jniá₅ de'₂ 'ne₂ ca₂tíng₂ 'ë'₅₄ jui₅ dse₃ 'a₂ lia'₂ ca₂tfin₂ jmo₃: A₂jme₁tiin'₅ on₃jua'₅₄ a₂cha₂ 'e₂ 'ín₂ 'au'₂, on₃jua'₅₄ a₂caun₂ lë₁líng'₄,⁸ chei'₅₄ jmá'₃ lia'₂ quian'₅₄ jág₁ rë₂ a₂tsá₃ 'ein₂ lé₂ le₃'ë₃ 'lig'₅₄, ia₁jaun₂ le₃gui'₅₄ jui₁lia'₂ dsa₂ i₂nau₂ quen₅, ia₁ tsá₃ 'e₂ cha₂ a₂ag₃ 'lig'₅₄ jniog₄.

⁹ Jui₁lia'₂ dsa₂ i₂jme₂ti₃ ne₄ juig₅₄, tioin'₂ jág₁ dse₃ jui₁jme₂ti₃ ca₂le₃jé₃ 'e₂ ta₁ te₂néi'₂ dsa₂ juig₅₄, jui₁jmo₁₂ bá₄ jë₂ a₂të₅ dsí₅ juig₅₄, tsá₃ 'nió'₅ a₂caun₂ lë₁qui₂ñag₃ ne₄ 'éi₂.¹⁰ Tsá₃ 'nió'₅ qui₃jniá'₂ 'e₂ cha₂ quió'₅ juig₅₄. Ca₂le₃jé₃ bá₄ 'nió'₅ jmo₃ tí₅ jág₁ quió'₅ ia₁jaun₂ bá₄ rë₂ jniá₂ qui₂rë₂lag₄ juá'₅ quió'₅ Diú₄ quián₂ jniog₄ i₂lió₂.

¹¹ Ia₁ ma₂ca₂jme₃jnia₅ Diú₄ a₂'ua₁ dsí₅, a₂lióin₂ bá₄ ca₂le₃jín₃ dsa₂ mi₂güíg₃,¹² jme₂tag₂₃ a₂tí₄ jniog₄ ca₂le₃jé₃ a₂'lig'₅₄, ca₂le₃jé₃ a₂'ín₅ dsí₅ dsa₂ mi₂güíg₃ la₂; a₂le₃chong₂ jniog₄ mi₂güíg₃ la₂ 'en₅₄ dsí₅, quián₁ caun₂ jui₅ co₂dsau₅, qui₂rë₂jin'₅₄ jniog₄ ja₁con₂ Diú₄ né₃.¹³ Jme₂tag₂₃ ján₃, a₂'io₁ jniog₄ chi₂jnia₁ a₂'ín₂ dsí₅ a₂le₃ti₃ jág₁ jlá'₁ jaun₂, a₂le₃jniá₂ a₂co₂tág₅ co₂'né'₅ quió'₅ Diú₄ 'uan'₂, Cristo Jesús^d i₂lió₂ jniog₄.¹⁴ 'Éi₂ né₃, ca₂jíin'₂ 'ñiog₅ o₄quián₂ jniog₄, ca₂quí₃ ca₂lió₂ jé₄ ca₂le₃jé₃ a₂'lig'₅₄,

^d13 o₃, "Jesucristo."

ca₂chéi₂ jniog₄ ia₁jaun₂ léi₂ jniog₄ dsa₂ juig₂ quiáin₅ 'ñiog₅, a₂dsen₅₄ dsí₅ jmó₁ jmá'₃ a₂dse₃.

¹⁵ Jág₁ në₅ bá₄ dsia₄ tiá₂ 'au'₂ jmo₄ 'éi'₃ chei'₅₄ dsa₂ qui₁cuë'₅₄ bí₂, a₂të₁jéin'₄ në₃. Tsá₃ lë₁cuë₂ jmig₄ jua'₅₄ a₂tsá₃ jme₃go₃ dsa₂.

Jui₁lia'₂ a₂ca₂tín₂ dsa₂ i₂'én₂ jmo₃.

3 ¹ Chei'₅₄ 'ne₂ jui₁dsiog'₂ bá₄ dsí₅ jui₁tioin'₅₄ 'éi'₃ quió'₅ dsí₂tan₅₄ dsa₂ can'₅₄, jui₁nei₅₄ gau₂ jág₁ quió'₅, jui₁chain₂ co₂jnjai₅₄ a₂jmo₃ ca₂le₃jé₃ ne₅₄ ta₁ dse₃. ² Tsá₃ jui₁'iin₁₂ 'lig'₅₄ 'i₁jan₂ dsa₂, tsá₃ 'ein₂ 'en₄ jmái'₂ mi'₅₄ në₃. Jui₁lein₅₄ bá₄ dsa₂ juin'₂ dsí₅, 'ua₁ dsí₅ ja₁con₂ ca₂le₃jín₃ dsa₂.

³ Ia₁ le₂në₅ bá₄ jme₁lág₄ jniog₄ guio₅₄ le₂jñiá₅ ján₃, tsá₃ 'en₅₄ dsi₅, tsá₃ në'₂ jniog₄ ja₁con₂ Diú₄. I₂jme₁ma₂i₂cón'₅ bá₄ jniog₄ jme₁i₂nio₄. Jme₁i₂nio₄ jniog₄ qui₂rë'ñei'₅₄ quian'₅₄ ca₂le₃jé₃ ne₅₄ cosa 'lig'₅₄ jme₁'ín₅ dsí₅ jniog₄ jmó₁. 'Nio₅ 'lag'₅₄ jniog₄ jme₁chong₂. Jme₁uig₅ dsí₅ jniog₄, jme₁'iog₅₄ dsa₂ jniog₄, ton'₂ jme₁'nia₅₄ jniog₄ rìn'₅₄ le₂jau₂ le₂jau₂. ⁴ La₁ jme₁ca₂jme₃jnia₅ Diú₄ quián₂ i₂lió₂ ca₂jmo₃ léi₄ a₂'ua₁ dsí₅, a₂'nioi₃ dsa₂ mi₂güíg₃, ⁵ jaun₂ ca₂lió₂ jniog₄, on₃jua'₅₄ ia₁ 'e₂ dse₃ a₂ma₂jmó₁. Të₂le₃ 'ñiog₅ bá₄ ca₂dsia₃ ñéi₂ dsí₅ jniog₄ ca₂lió₂ të₂le₃ quian'₅₄ a₂qui₂ca₂chéi₂ jniog₄, a₂ca₂rë₃chóng₃ táng₃, a₂le₃chong₂ quián₁ caun₂ jui₅ 'mí₂, ca₂jmo₃ Jme₂dsí₂ Jñió₅ ⁶i₂ca₂tein₃ lia'₂ rë₂tsón₂ ne₄ quián₂ jniog₄ të₂le₃ quian'₅₄ Jesucristo i₂lió₂. ⁷ Të₂le₃ ia₁ a₂'ua₁ dsí₅ ma₂ca₂juá'₂ në₃, dsa₂ ma₂le₁jín₃ bá₄ jniog₄, jaun₂ guéi'₂ bá₄. Jaun₂ le₂në₅ bá₄ 'ín₂ dsi₅ jniog₄ guéi₁ ja₁le₃chong₂ co₂tan₅₄.

⁸ Jág₁ dsau₅ dsón'₂ bá₄ në₅, jaun₂ 'nio₃ jniá₂ caun₂ 'éi₂ 'au'₂ caun₂ jme₁tiin'₅ jág₁ në₅, ia₁jaun₂ i₂'én₂ le₃quió'₅ Diú₄ quiñ'₃ bí₂ jmo₃ a₂dse₃. Ca₂le₃jé₃ cosa në₅ dse₃, tí₅ ta₁ quió'₅ ca₂le₃jín₃. ⁹ La₁ tsá₃ lë₁cuë₂ jmig₄ jua'₅₄ a₂lë₁qui₃ñag₃ dsa₂ jág₁ a₂tsá₃ 'e₂ ta₁ tí₄, jui₁lia'₂ jág₁ a₂'in₅ dsa₂ dsa₂ i₂qui₂ma₂ñí₂ ma₂líg'₂, jui₁lia'₂ jág₁ a₂tsín₅ dsa₂ a₂nio₅ mi'₅₄, jui₁lia'₂ jág₁ a₂já₅ o₄quió'₄ Si₂ 'Éi'₃ në₃. Ia₁ tsá₃ 'e₂ ta₁ jmo₃, tsá₃ 'e₂ ta₁ tí₄.

¹⁰ Në₁jua'₂ chan₂ jan₂ i₂jmo₅ le₁dson'₅₄ dsa₂, te'₂ co₂ráun₂, tñ₃ ráun₂, 'é₃ jág₁ chei'₅₄ tsá₃ dse₃ jmo₃ le₂jaun₂. Chi₂jua'₂ tsá₃ tón'₂ jui₅ jág₁ quiáng'₂, co₂dsia₅ dsein₅₄ jé₄ quián'₂ 'nia'₂. ¹¹ Jñia'₅₄ lia'₂ co₂në₅ bá₄ ma₂ca₂rë₃ñí₂ 'ne₂, dsa₂ i₂le₂'éi₂ në₃ tsá₃ ma₃'e₂ dse₃ dsí₂jein₃ dsí₅; të₂le₃ quian'₅₄ dsáu₁ 'ñiog₅ bá₄ a₂'liog'₅ quió'₅.

Cué'₅ jág₁ riin'₅₄ con'₂ ca₂tín₂ guioin₅₄

¹² Jé₁ma₂té₂ rë₁tsín₅₄ jniá₂ i₂chen₂ Artemas ne'₅₄, o₃ i₂chen₂ Tíquico 'e₂, në₅ i₂ñe'₂ dsí₂jui₅ i₁jag'₄ jui₅ Nicópolis, ia₁ ja₁jaun₂ ma₂i₂jiog₅ dsí₃ ñig₅₄ jein₂ güíg₂. ¹³ Zenas i₂chén'₅ ne₄ jág₁, quian'₅₄ Apolos në₃, 'a₂ con'₂ lé₂ quiáng'₂ jme₁'oin₁₂ 'a₂ con'₂ jñia'₅₄ len₅ quió'₅ tioin'₅₄ jui₅.

¹⁴ Jui₁le₂tin₂ bá₄ dsa₂ quián₂ jniog₄ jmo₃ a₂dse₃ jme₂'oin₅₄ riin'₅₄ jui₁lia'₂ jme₁'nió'₅, ia₁ con'₂ tsá₃ ñó₅ në₁tsá₃ 'e₂ dse₃ ca₂rau₂ lia'₂ chain₂.

'Ág'₅ jág₁ jë₁ca₂tó'₂, cuag₂₃ Diú₄ né₃

¹⁵ Ca₂le₃jín₃ i₂quian'₅₄ jniá₂ ja₁lá₃ chein₂₃ jág₁ a₂cuiin₂₃ Diú₄ 'ne₂.
Cuin₅₄ Diú₄ ca₂le₃jín₃ i₂'nio₃ jniog₄ i₂'én₂. Juí₁jme₂gu'₅₄ bá₄ Diú₄ 'nia'₂
ca₂le₃jíng'₃.
Co₂në₅.